

Հանդիպում ՀՀ Վայոց ձորի մարզպետի մոտ

13.11.2018



ՀՀ Վայոց ձորի մարզպետ Տրդատ Սարգսյանն այսօր հանդիպեց Հայաստանի Մանկական զարգացման հիմնադրամի տնօրեն Լուսինե Միմոնյանի հետ: Հանդիպման սկզբում Հիմնադրամի տնօրենն ասաց, որ ցանկանում են մարզպետին ծանոթացնել հիմնադրամի կողմից մարզում իրականացված աշխատանքներին և որպես նոր կառավարության ներկայացուցիչ շարունակել համագործակցությունը: Լ. Միմոնյանը նշեց, որ հիմնադրամն այս պահին մարզի խոշորացված համայնքներում իրականացնում է <Հասանելի համայնքային սոցիալական ծառայություններ> ծրագիրը: Նշեց նաև, որ զարգացման խնդիրներ ունեցող երեխաների համար ծրագրեր են իրականացվել մարզի համայնքային մի քանի մանկապարտեզներում: Իսկ նախատեսվելիք ծրագրերից կարևորեց 13-14 տարեկան երեխաների համար տեխնոլոգիական ծրագրերի իրականացման հեռանկարը:

Մարզպետ Տ. Սարգսյանը շնորհակալություն հայտնեց հյուրերին մարզում իրականացվող ծրագրերի համար և հիմնադրամի հետ համագործակցելու պատրաստակամություն հայտնեց:

Մինչ մարզպետի հետ հանդիպումը հիմնադրամի ներկայացուցիչներն աշխատանքային հանդիպում ունեցան խոշորացված համայնքների սոցիալական գործառույթ իրականացնող մասնագետների հետ, որին մասնակցում էր նաև մարզպետարանի ընտանիքի, կականց և երեխաների իրավունքների պաշտպանության բաժնի պետ Արամ Գրիգորյանը:

Հանդիպումն ուղղված էր ծրագրի ընթացիկ աշխատանքներին, ինչպես նաև խոցելի ընտանիքների հայտնաբերման և այդ ընտանիքների կարիքների գնահատման գործիքակազմի գործածության և ներդրման հարցերին:

Հանդիպման ընթացքում խորհրդատվություն տրվեց սոցիալական դեպքերի վարման գործընթացի, համայնքային, պետական և ոչ պետական կառույցների հետ համագործակցության վերաբերյալ: Խոսվեց նաև սոցիալական բազմաշերտ խնդիրների շուրջ և նախանշվեց լուծման հնարավոր ուղիները:

Ծրագրի ներկայացուցիչներն արձանագրեցին, որ մարզում համայնքային սոցիալական աշխատանքը մտնում է զարգացման նոր շրջան:

Հավելենք, որ աշխատանքային հանդիպումից հետո նրանք տունաց պիտի կատարեն Մալիշկա համայնքի 2 ընտանիք: